

15/1/2018 MIS 20 S. Harian

Projek fertigasi ikan sangkar tunjuk hasil positif

KAMPUNG PELA - Projek berkelompok secara fertigasi temakan ikan sangkar dalam kolam di sini yang diusahakan sejak lima bulan lalu mula berhasil apabila hampir enam tan ikan dapat dituai mulai bulan ini sekali gus mampu menjana pendapatan sehingga RM60,000.

Timbalan Pengurus Besar (Pembangunan) Lembaga Kemajuan Terengganu Tengah, Tengku Ahmad Nadzri Tengku Musa berkata, projek temakan ikan patin dan tilapia itu diusahakan 10 peserta di bawah peruntukan Ketengah melibatkan sebanyak 10 sangkar.

"Hasil diperoleh pusingan pertama ini membolehkan peserta tambah pendapatan kira-kira RM600 sebulan, ia sebagai kayu ukur menilai sejauh mana projek temakan begini dapat bantu peserta tingkatkan pendapatan mereka.

"Melihat kepada senario positif ini, Ketengah bercadang untuk menambah 10 lagi kolam di kawasan ini dijangka bermula April depan dengan peruntukan RM30,000.

"Selain itu, kita akan turut fokus projek pertanian atas tanah rizab kerajaan di kawasan ini dengan



Ghazali (kiri) dan Tengku Ahmad Nadzri (tengah) menarik jaring sewaktu Majlis Menuai Ikan PPEK sempena Program Jalinan Kasih dan Jom Bantu Rakyat Wilayah Ketengah 2018, di Kampung Pela, kelmarin.

mengusahakan tanaman melibatkan keluasan tanah kira-kira empat ekar. Perancangan ini juga dijangka berjalan tahun ini.

"Bagi projek temakan ikan sangkar kolam ini selain di Kampung Pela, dua lagi projek dijalankan di Pasir Raja, Dungun dan Kuala Jengai, Dungun. Ketengah peruntukan RM200,000 sepanjang tahun lepas bagi projek begini termasuk makanan serta pembelian benih," katanya.

Beliau berkata demikian pada Majlis Menuai Ikan Projek Peningkatan Ekonomi Kampung (PPEK) sempena Program Jalinan Kasih dan Jom Bantu Rakyat Wilayah Ketengah 2018, di sini, kelmarin.

Majlis disempurnakan Pengerusi Jawatankuasa Komunikasi, Multimedia dan Tugas-Tugas Khas negeri merangkap Adun Ajil, Ghazali Taib dan pada majlis itu turut diadakan aktiviti memancing melibatkan pihak media.